

«Жаңағы кемпірі құрғыр мыжыш нені сөз етіп еді? – деп ойлады биік өкшесін асфальтқа қадай алмай қикалақтап, үйіне бағыт алған Ұлжан. – Ә, есіме түсті, «Қызыл ағаштан гарнитур алдық» деген екен ғой. Алады да жатады, анауысын уже сатып та үлгергені ме?! Сосын палас жайын көп айтты ғой? Әлде паласын көшеге жайып қойған жерінен біреулер украли, возможно?...»

«Әлгі қаншық сүйреңдеп, кетейін десем жібермей, не деп мазамды алып еді? – деп кейіді Жұмабике, ауыр денесін, екі иінінен дем ала, әрең қозғап, «Комиссионный» деп аталатын дүкенге кіріп бара жатып. – Дұрыс, жаңа есіме түсті, «Бір кандидат жігіт маған ғашық боп жүр» деп, ақыл сұраған екен ғой. Қап, көргенсіз-ай, сүлімдей күйеуінің көзіне шөп салайын дей ме екен сондағы ойы?! Біздің үйдегіге де айтып, ұрсып қою керек екен: әнебір келіншекпен көрдік деп еді ғой әлгі... кімдер. Алдын ала сескеніп, бойын жия жүрсін...»

Бұл кезде қаланың орталық алаңында, дәл манағы жерде, басқа екі әйел кездесіп, шүйіркелесе бастап еді. «Олар не жайлы сөйлесті?» дейсіз бе? Кешірерсіз, бәрін мен ғана білуге тиіс пе екем!..



☞ Сана қай жерде тұрады

— Әрине мұны сатып алсын деп шығарып тұр. Әрі біздің алатынымызға сеніп... әйтпесе шығара ма!..

Бұл әңгіме күн кешке айналған мезгілде қаланың орталық көшелерінің біріндегі байланыс бөлімшесінде болып еді. Жинақ қассасы да осы арада. Кісі ығы-жығы көп, ешкім жок кезде-ақ қайнап тұратын аядай жерде көп адам бас қосқан соң не жорық – дем алып болмайды. Бастарына байлаған орамалдарын босатып, бөріктерін шешіп, сонда да тыныштық таба алмағандар әлсін-әлі сыртқа шығып, ауа жұтады да, қайта кіреді. Әлде біреулер бұрышқа ырсы-ырсы етіп балға тоқылдатып, жәшік шегелеп жатыр. Ел туғандарына не дос-жарандарына сәлемдеме жібереді, ақша алады, керісінше, кассадағы қорын молайтады, күзгі үлкен мейрамға дейін әлі қыруар уақыт бар екеніне қарамастан, арзан нарықпен жеделхат жібереді – тірі кісінің шаруасы түтесіле ме. Сол тығыздықта, аяқтың астына оратылып, шешелеріне ілесіп келген кішкентайлар да жүр. Залдағылардың көбі әйел адамдар.

Елдің, тіл беземек түгіл, жақ аңуға зауқы жоқ. Үздіксіз сөйлеп тұрған әлгі кісі ғана. Танауының жуан әрі шолақтығы мен екі көзінің тасырайып ұясынан шыға жаздап тұрғаны болмаса, онша сүйкімсіз де емес – келісті орта бойлы, басы үлкен, бет мүшелері ірі. Сарғыш өңді отыз бестердегі азамат. Үстіне қысқа тон киіп алыпты, оның екі жеңінің ұшы түрулі, омырау түймелері ағытулы, басындағы құлақшыны (асыл теріден тігілген жақсы құлақшын еді құрғырын!) көк желкесіне қарай ысырылып кеткен. Жалпы азаматтың бүкіл сырт көрінісі әлде бір тынбай жатқан шұғыл істі осы қазір қолға алып, тындырып тастардай шұғыл да батыл еді. «Осы мен бірденені теріс істеп қойып, ұятқа қалып жүрермін-ау!» деп әсте сескенбейтін жаужүректер болады, сыңайына қарағанда, бұл да сол ағайындардан. Бір қолына жап-жаңа екі тері қолғапты сірестіре ұстап, екінші қолын, шолақ тонның шалғайын қайырып жіберіп, бүйіріне тіреп, шалқайыңқырап тұр. Айналасындағыларды шырайы тек қана бір нәрсеге – «Сендер менің әлдеқашан біліп қойғанымның оннан бірін де білмейсіңдер!» деген үзілді-кесілді сенімге меззейтін тасырайған балық көзімен анда-санда шолып қояды. Сол кезде азаматтың мұрны жыбыр етеді де, мұрнының етегінен бетке қарай бағыт алып күлкі жүгіреді. Ізінше екі езуіне жинала қалған қыртыс бетінің төменгі жағына едәуір салмақ жинайды. Дәл осы сәтте – езуі төмен түсіп, ерні ашылғанда – азамат құдды тайызда қалып, ауа жетпеген тұқыш балықты елестетеді.

— Бізде саналы адамдар аз, әйтпесе әр түрлі лотереялар, облигациялар, спортлотолар киоскілерде үйіліп жатар ма еді? Жатпас еді!.. Алсын деп шығарған соң алып тұру керек, – деді азамат тағы. – Әйтпесе ақшаны жинап қоямыз да, соның түріне қарап қызықтағанға ғана мәзбіз. Неменеге керек ол ақша, үш-төрт мың сомнан асқан соң қызығы да жоқ қой! Мысалы, мен үшін әлгі түсімнің түсіп жатқаны, түспей жатқаны – бәрі бір, – деп шалқыды.

Ешкім ләм-мим деп жауап берген жоқ.

Әңгіменің бет бұрысы осы сәттен басталып еді. Әлгі жігіт енді касса ұстайтын келіншек «Өзіңіз суырыңыз» деп ұсынған бумадан бір лотерея билетін алып тұрып сөйледі:

— Бұл, әрине, ешқашан ұтпайды, ұтса да, ұтыс шығатындар біз сияқтылар емес! – деп, дәл қасында тұрған жас қызға шүйілді.

— ?!

— Сонда да алып тұру керек! Олай ету – біздің азаматтық борышымыз. – Менің тіпті ұтқым келмейді ал! – деді ол. – Әйтпесе қалай, елдің бәрі ұта берсе, не болмақ?! Сондықтан ұтуды ойлау – ұсақтық деп санаймын.

— ...

— Солай... ал егер қайыптан тайып ұтып кетсем, онда әлгі ақшаны түгел осы жинақ кассасына, қарындасым, сізге әкеліп берер ем.

Касса ұстайтын келіншектің енді бұл сөзге жауап қайтармасақ шарасы қалмаса керек:

— Не үшін?! — деп сұрады.

— Ештеңе үшін де емес, тек әншейін... Себебі ол ұтыстың маған түкке де қажеті жоқ. Газетке шыққан бойда қараймын да, ұтса, өзіңізге әкелем, қараңыз да тұрыңыз. Тіпті қажет деп жатсаңыз, лотерейдің шетіне қазір-ақ сіздің атыңызды жазып қояйын. Атыңыз кім еді?.. Катя?.. Катя емес пе?.. Клава?.. Міне, жақсы есім!.. Солай, Клава, ұтсам болды, түп-түгел өзіңізге әкеліп берем.

— Маған ешкімнің ақшасы қажет емес! — деді келіншек, қып-қызыл болып.

— Жә, жә, бас тартпай-ақ қойыңыз, мен бәрібір тыңдамаймын!.. — Азамат осы арада сәл ойланып қалды да, кенет өзге шешімге бағыт алды: — Әлде сізге шакалат әкеліп берсем бе екен, а?.. Сол дұрыс екен ғой, ақша әкелгеннен гөрі...

Осы арада ел шыдамай, алғаш рет қыстыға күліп жіберген, бұл күлкінің астарын ұққан ол жоқ — шалқи берді:

— Шакалат, сосын тағы бірдеңе, айталық, басқа тартатын орамал алу керек. Бұған және иісу қосса...

— Ал егер ұтысыңыз бұл атап тұрғандарыңызға жетпей қалса? — деді кассадағы келіншек, бұл жолы өзгелердің күлкісіне қосылып.

— Ал сіз жететін етіп, ұтыс соған жететін етіп... етіп беріңіз, — деді азамат шынымен толқып; жүзінде енді көңілділіктің нышаны да жоқ еді. — Оң қолыңызбен... м-м, солай ғой, бәсе, «Ұта гөр!» деп...

— Жақсы, сөйтейін, — деді келіншек, енді күлкіден тыйылып, бірақ айқын мысқылмен. — Өзге шаруаңызды мана тындырдыңыз, ел болса күтіп қалды. Сондықтан алатын билеттеріңізді алып, өзгелерге де терезеге жақындауға мүмкіндік берсеңіз... Нешеуін берейін лотерея билеттерінің?

— «Нешеуін берейініңіз» не?! — деді азамат, балық көзі бақырая таңқалып, басын терезеге кептеп. — Біреуін бересіз де!.. «Нешеуін» дегендей-ақ!.. Сосын әлгі... ұтатынынан...

Оның касса ұстайтын келіншек ұсынған билетті алмақ болып созған қолы дірілдеп тұр еді.

...Азамат табалдырықтан сыртқа аттап, соңынан есік жабылғанда болме ішінде әр жерден еңсені жеңілдетер күрсініс естілді.

Төбеге шығып сынасаң...

*Ш*абақтары қиқа-жика ескі сатымен өрмелей отырып, өлдім-талдым дегенде Ноқай үйінің төбесіне шықты. Қожайынның сен тұр, мен атайын көкесі еді Ноқай. Сыртының соңғы жолы қашан сыланғаны белгісіз, үйден гөрі үйіндіге көбірек ұқсайтын баспанасы да, көрнеу мойын омыртқаннан дәметкен сатысы да соның бұлтартпас айғағы.

Ноқай әлденеше жылдан бері жұмыс істемейтін. Жер өлшегіш, коймашы, коймашының қолғабысшысы, тағы басқа атақ-дәрежесі тұрлаусыз қилы-қилы кәсіптің басын қосып, шатаса жаздап жүргенінде бір күні кеңшардың көпшілікті тамақтандыру жөніндегі бөліміне жұмысқа алынып, мәртебесі өсіп шыға келді. Сөйтіп жүріс-тұрыс, мінез-машықты да түзеп, түкірік шаша шапшаң сөйлемеуге де төселіп, тімтәуір болып қалған, — әттең ойламаған жерден мұрттай ұшты. «Сойылған малдың есебін қасақана шатастырдың» деген айып тағылып еді.

«Қызметіңіздің жөні қандай?» деген кісіге бұл: «Енженермін», — дейтін. Анау: «Техникум құтардыңыз ба әлде институт құтардыңыз ба?» — деп сұраса, бүйірін шарт таяна: «Мен, кәдімгі, ештеңе құтармаған енженердің дәл өзімін!» — дейтін Ноқай-екең. Шынында да, мақтанса мақтанарлық емес пе: калтасындағы күректей «қатырмамен» екінші бірі инженер, қолыңнан келсе, мықтылық сынаспақ болсаң, еш оқу-тоқусыз инженер болып көр! Орыс, латын әріптерін тоғытып қатар пайдаланатындардан өзінен басқа ондай дырауды көрген емес Ноқай!

Қайран сол күндері-ай десеңші! Құрып кеткір бөтелкені бұзбай жұтамын деп шатылды ғой! Қызғын қалпында «байқамай», төрт-бес тұяқты көз қысар жағына сырғытып жіберіпті.

Тұғырдан түскеннен кейін Ноқайекең кеңшар басшыларына: «Маған енді, берсеңдер, тағы да атақ-дәрежеме лайық қызмет беріңдер. Жүк машиналарың бар босын, кешегі енженердің бүгін келіп салдырылатып сүт тасығаны ұят болар», — деп көріп еді, ол тілегі қабыл алынбады. «Жарайды, бүйтсеңдер, Ноқайды бағаламағанды мен сендерге көрсетейін!» деді де, ірге көтерді. Содан бері, міне, орталықтан шалғай, ұзын жолдың бойында тұрады. Жапан түз, әйтсе де, обалы не керек,